

**Tiroma Leta
Paul Mo Ulia Isan
Timothy
Leta Nike**

Timothy mo lo usuri Paul na nona voko (Rom 16.21; 1Co 16.10; Php 2.19) mata nora rasua hin Iesu. Paul mo hitea sohena natuna matea (1.2). Timothy mo mai patu tamlohi na nona rani peresi Paul, enia tapalan Paul. Paul mo sohai leta sei isan Timothy, pani vujangi hinia mo tueni na mauri vao kalesia non God. Mo vujangi na malele tataholo vara řa viřoni na patu tamlohi hinia, deacon la vai na vavahinau non God (3.1–7; 8–13; 5.17–20).

Reti non Paul akerihi řa eři rasua tarea:

‘Reti nike, o eři rasua ale mo tataholo vara o lavi vevuhia, vara, ‘Křisto Iesu mo mai na varama vara i juri na tamlohi hehe.’ Enau na sasati jea hinira. Pani God mo řomopoiiau matan hinia sei, matan enau na sasati jea hinira, ale Iesu Křisto mo tauau vara a mai tovongi matea vara i vujangi na nona řomperavu isan la haratu la pa rasua mata mauri tui.’ (1.15–16)

Hin Leta Nike

1. Retioloolo (1.1–2)
2. Retivujangi mata mauri kalesia (1.3–3.13)
3. Hina aulu na nořa lotu (3.14–4.5)
4. Paul mo retituetueni Timothy (4.6–6.21)

Reti Tiroma

¹ Enau Paul, vahařule matea non Křisto Iesu God mo viřoniau na nona suiha, Křisto Iesu nořa Jujuri enia nořa řomtoho.

² Timothy, natuku hin noŕa mauri rasua, na lo usiusi matam vara God Tamaŕa enia Kŕisto Iesu noŕa Moli, la sileho na řomŕuhu, na řomopoia peresi na tamata.

Retiŕoaŕoahai Mata Vujangi Haluhalu

³ Sohen na verea řilangi isam hin rani atu na tauho Ephesus vara a vano Macedonia, na verea vara o pa toho vara o sile na reti isan la tamlohi atu vara la sopo vujangi te vujangi tinapua,

⁴ teni vara la sopo usuri te sorasora halu teni te sorasora vono mata sava pina tuai la tataholo hinira, vuana enia řomŕomi vono purongo, la hinau sei la sopo tueni te tamlohi na mauri mata rasua hin God.

⁵ Pani noŕa řomŕomi tavera hinia, enia opoia, opoia mo tai isana mapu vokevoke peresi na rongovosahi na hinau tataholo, peresi na rasua varaŕuhu.

⁶ Tamlohi hai, la jalio, la posi la usuri na sorasora vono,

⁷ la opoia vara la mai tamlohi vujangi mata leu, pani la sopo levosahi na sava la lo verea teni na hinau sei la verea vara la levosahira mo řuhu vara la tataholo teni mo vono.

⁸ Ale řa levosahia vara Leu mo řuhu, pani vara tea mo lavia na posposi tataholo purongo,

⁹ ha levosahi harihi: God mo sopo sile na leu mata tamlohi tataholo, pani isan la haratu la lo vaivaileu, la haratu la sopo oloolo hin te tamlohi hatea, la haratu la lo usuri na posposi varama, la haratu la lo hehe, la haratu la sopo sile na oloolo isan te hinau mata oloolo, la haratu la lo vilimatei

na tamara teni tinara, la haratu la lo vilimatei na tamlohi tinapua,

¹⁰ ale la haratu la lo vai na posposi lumiha, tamlohi la vaivaileu peresi na tamlohi, hañai la vaivaileu peresi na hañai, la haratu la lo tauri vanaho na tamlohi mata la hañehira, ale la haratu la lo retihalu tarea, la haratu la lo taviti halu na lolo court, ale na posposi lejileji tari sei la lo turuleji na vujangi řuhu sei,

¹¹ mo lo usuri na Retiřuhu řuhuřuhu non God sei enia avulahi tavera, ale Retiřuhu sei mo taua isaku.

¹² Na vere meje isan Křisto Iesu nořa Moli, mo sile na řilařilangi isaku, matan mo hitea sohena vara a eři vai na masalona, ale mo viřoniau vara a volitusi isana,

¹³ hina purongo vara tiroma na lo verelejeji Křisto, na lo unuhi na nona tamlohi vara a komora, ale na kerekerera, pani God mo řomopoiu mata na sopo lo levosahi na sava na lo vaia matan na sopo rasua,

¹⁴ Ale řomřuhu non nořa Moli mo mařivi savulevule matakū na rasua peresi na opoia hin Křisto Iesu.

¹⁵ Reti nike, o eři rasua mo tataholo vara o lavi vevuhia vara: Křisto Iesu mo mai na varama vara i juri na tamlohi hehe. Enau na sasati jea hinira.

¹⁶ Pani God mo řomopoiu matan hinu sei, matan enau na sasati jea hinira, ale Iesu Křisto mo tauau vara a mai tovongi matea vara i vujangi na nona řomperavu isan la haratu la pa rasua mata mauri tui.

¹⁷ Nake, isan Supe mata tauni tari, i sopo eři tihai, tea i sopo eři hitea, enia God matelete, řa pa

silea na oloolo tavera peresi na hasohaso na rani tui tui tarea. Amen.

Vavahinau Non Timothy

¹⁸ Timothy natuku, reti nike na lo vereea isam, mo lo usuri na retimangovi sei la vereea matam moiso, la pa tueniho vara o efi vai na vuro ruhu,

¹⁹ tarea o tauri rilangi na nom rasua peresi na nom rongovosahi na hinau mo tataholo, ale tamlohi hai la tau narihira, la komo na nora rasua sohena boti mo vujahi kosahia na paranga.

²⁰ Tatuara sei, Hymenaeus enia Alexander, enau na taura la vano na liman Setan vara i pa vujangira vara la pa sopo mele turuleji hin God na nora vujangi haluhalu.

2

Vujangi Mata Lotu

¹ Tiroma, na lo vereea rilangi vara tamlohi na nora usiisi mata tamlohi tari, la usi God mata tuetueni, la usiisi mata tinapua, ale vara la vere meje isan God.

² Mata supe peresi la haratu sei la lo tauri na suiha, matan vara ra pa efi mauri na mauri mo tamata, ale mo malum vara ra efi usuri na mauri tataholo, ale ra sile na oloolo isan God.

³ Usiisi sohena, mo ruhu na nahon God, nofa Jujuri, ale mo avulahi hinia,

⁴ matan God mo opoia vara i juri na tamlohi tari, ale vara la pa levosahi na retivara ruhu.

⁵ Matan God enia matelete purongo, ale tamlohi tuetueni matelete purongo sei enia mo malele tamlohi la mai isan God, tamlohi atu enia Kristo Iesu,

⁶ mo hase silea sohena volituhu mata tamlohi tari, reti sei enia vereulia sei God mo silea na rani tataholo.

⁷ Matana, God mo viřoniau vara a mai vahařule matea, ale vara a mai tamlohi retivujavujangi matea, na lo vere na varařuhu na sopo halu, God mo řuleau vara a vujangi na tamlohi řořoha na malele rasua peresi na retivarařuhu.

Posposi Mata Hařai

⁸ Moiso, na opoia vara tamlohi na jara tari la usiisi, ale la tahe na limara tapu isan God, i pa sopo te lolokoru teni vasvas hinira.

⁹ Sohena, na opoia vara tarea hařai la ruru na řomřomi řuhu i tataholo na naho tamlohi. Mo řuhu vara la sopo peri na vulura na malele tinatinapua peresi na hinau mata gold teni huřutavila teni ruru volina mo sahe aulu jea,

¹⁰ pani hin haratu purongo, mo tataholo mata hařai sei mo lo vereea vara enia mo lo usuri posposi atu God mo opoia, peresi na vavahinau řuhu.

¹¹ Hařai la pa toho malum la tapurongo, ale la tatamahu vara la oloolo matan vara la eři lelevosahi.

¹² Tarea, enau na sopo majinga vara hařai la vujangi teni la mai patu tamlohi la tiroma la aulu na tamlohi. Mo vono, enira la pa toho malum purongo,

¹³ matan God mo vai Adam tiroma moiso mo pa vai Eve.

Gen 2.7, 21-22

¹⁴ Ale Tiapolo mo sopo halu Adam, mo halu na hařai, ale mo tope na retileu non God. *Gen 3.1-6*

15 Pani God i pa juri na haʻrai na tapetape, vara la lo turu ʻrilingi na rasua, opoia, la hahau na mauri vokevoke peresi na posposi hasera taurilatira.

3

Patu Tamlohi Na Vao Kalesia

¹ Reti nike o eʻri rasua, vara tea mo tau na ʻromina vara i pa patu tamlohi rasua matea mata tamlohi rasua, mo opoi na vavahinau ʻruhu matea.*

² Ale matana, o kilau vara mo sopo te hinau na maurina, mo lahi na haʻrai matelete, mo hase taurilatia, enia tamlohi ʻromʻromi, o hitea vara tamlohi la lo sile na ololo isana moiso, enia mo avulahi vara i lavi na tamlohi tinapua na imana, ale enia mo levosahi na posposi mata vujangi mo ʻruhu,

³ Ale, enia mo sopo tamlohi inu hajavua, mo sopo tamlohi valum, pani ʻromina mo malum, mo sopo tamlohi vasvas, ale mo sopo tamlohi ʻromjea na mania,

⁴ ale mo lo kilau mamahuni na lolo imana, ale natuna la sile na ololo isana, ale la ololo hinia.

⁵ Matan vara tea mo sopo eʻri kilau mamahuni na imana, i pa kilau mamahuni na vao kalesia non God soheʻa sava?

⁶ Enia i pa sopo tamlohi matea mo pa mai purongo na mauri kalesia, matan patuna i pa sosohi na mangisi tavera, ale i jovi sivo na talai non Tiapolo.

⁷ Moiso aulu hin haratu, tamlohi na jingoima la vereea vara maurina mo tataholo, ale matan i sopo

* **3:1:** *patu tamlohi rasua:* ʻfaramin reti sei, patu tamlohi enia tamlohi atu mo lo kilau na tamlohi rasua na jara matea.

eři jovi hin te vuna non Tiapolo, ale i mahanuhanu matana.

Malele Viřoni Na Deacon

⁸ Deacon sohena, o hitea vara tamlohi la lo sile na ololo isara moiso, ale enira la sopo meme masanga, la sopo tamlohi inu hajavua, la sopo řomtutuni na mania.

⁹ Ale la tauri řilangi na hinau luhu mata rasua na posposi sei tarea řomira la tataholo na nahon God.

¹⁰ Ale o vaihitera tiroma vara ko sopo hite te hinau na maurira, ale o pa majinga hinira vara la volitusi sohena deacon.

Hařai Deacon

¹¹ Hařai sohena, vara la deacon, o hitea vara tamlohi la lo sile na ololo isara moiso, la sopo sorasora tamlohi, la lo hase taurilatira, tarea la lo usuri na masalon God na hinau tari la lo vaira.†

¹² Deacon la lahi na hařai matelete, la lo kilau mamahuni na natura peresi na imara.‡

¹³ Matan la haratu la lo volitusi řuhu sohena deacon la pa lavi na hija řuhu nora, ale la pa lavi na řomřilangi na nora rasua hin Křisto Iesu.

Posposi Tataholo Na Vao Kalesia

¹⁴ La hinau sei na lo ulia isam, na lo řomtoho vara a pa vano isam vila,

¹⁵ pani vara te hinau mo tauriau, leta nike i pa tueniho vara o levosahi na posposi mo tataholo na vaon God. Vaona enia vao kalesia non God mauri, vao kalesia enia peri, ale enia lapiti retivarařuhu.

† **3:11:** *hařai:* hai la vereva vara hařai mo opoia vara i mai deacon, teni narou deacon. ‡ **3:12:** *hařai matea:* mo sopo tipahi na narouna hin te rani.

16 Hina tavera matea kama taviti hinia, pulo noŕa rasua enia hina luhu matea:
 Kŕisto, mo pala mo mai tamlohi,
 Tanume Tapu mo vujangia vara enia natu
 Kŕisto,
 angelo la hitea,
 ale tamlohi la vereulia na mara jara tinatina-
 pua tari,
 moiso tamlohi na varama la rasua,
 ale God mo lavia mo sahe aulu na hasohaso na
 tuka.'

4

Vujangi Nona Tanume Sasati

1 Pani, Tanumen God mo vere mamahunia vara na pongi hitahu tamlohi hai la pa vahaŕi na malele rasua matan la pa tapurongo isana tanume haluhalu peresi na vujangi non tanume sasati,

2 ale retihaluhalu sei la pa tai isana tamlohi tapnetano, ŕomira la sulimateira, ale la sopo mele levosahia vara sava mo tataholo,

3 ale enira la tapuhoro na lahi, moiso la horo na tatua hanhani sei God mo vaira matan vara la haratu la rasua la levosahi na retivaraŕuhu la pa lavira na vere meje,

4 matan hinau tari God mo vaira la ŕuhu, ale mo sopo te hinau vara tamlohi la ŕohu hinia vara la lavia la vere meje matana moiso,

5 matan reti non God peresi na usiusi mo lo vai na hanhani la ŕuhu na nahon God.

Paul Mo Retituetueni Timothy

6 Vara o vujangi la hinau sei isana vorai peresi na vevorai, o pa volitusi ŕuhu non Kŕisto Iesu,

matan ko hase vahaniho na Retiŕuhu peresi na vujangi ŕuhu sei ko lo usuria.

⁷ Pani o toho asau na sorasora vono la rongorongono vono, ale o hase vujangiho na posposi sei God mo opoia,

⁸ matan ŕa levosahia vara, vara ko vai na epem mo ŕilangi, haratu mo ŕuhu makomona purongo, pani vara tarea o lo usuri na posposi God mo opoia, i pa ŕuhu jea na maurim tari, mo ŕuhu mata maurin nake peresi na mauri atu i pa mai hitahu.

⁹ Reti nike o eŕi rasua, ale mo tataholo vara tamlohi la pa usuri vevuhia.

¹⁰ Matan harihi, ŕa lo tau na ŕomiŕa mo ŕilangi na vavahinau matana, ŕa ŕomtoho hin God sei mo mauri, enia Jujuri nona tamlohi tari, pani isan la haratu la rasua enia mo Jujuri varaŕuhu.*

¹¹ O retileu, ale vujangi na hinau nike.

¹² O sopo tinaŕihia vara tamlohi la hitesatihio matan ko uluvou purongo, pani tarea o vai na tovongi ŕuhu isana tamlohi rasua na nom retireti, na nom vavahinau, na nom opoia, na nom rasua peresi na nom posposi vokevoke.

¹³ Ale i pa tikeli na rani a mai isam, o lo tau na ŕomim vara tarea o lo evievi na Retitapu na naho tamlohi rasua, o lo vere mamahunira na malele tari mata mauri rasua, ale o lo vujangi na retivarafuhu.

¹⁴ O sopo ŕompurongo hin nom silesilea atu God mo silea isam na retimangovi atu hin rani atu la

* **4:10:** *reti sei:* God enia Jujuri nona tamlohi tari mata enia hasena i pa eŕi juri na tamlohi, pani i pa sopo tamlohi tari la pa mauri matan la pa sopo rasua, pani isan la haratu la rasu God nora Jujuri, enira la pa mauri.

patu tamlohi rasua na vao kalesia la usiusi la tau na limara na patum.†

¹⁵ Tarea o lo hahau usuri la vujangi atu, o tau vevuhi na řomim hinira matan vara tamlohi la pa hitea vara ko lo ulua na mauri rasua.

¹⁶ O hase kilauho, o kilau mamahuni sava ko lo vujangia. O turu řilangi hin la hinau sei matan vara o vaia o pa eři juriho peresi la haratu la lo tapurongo isam.

5

Vavahinau Nona Patu Tamlohi Rasua

¹ O sopo hapuhi na tamlohi taunina mo jeu na taunim, pani o usia i řilangi isana sohen ko lo vaia isan tamam, ale o retireti isan la haratu taunira mo sopo lo jeu na taunim sohena tasim.

² Isana hařai taunira la jeu na taunim, o retireti isara sohen ko lo retireti i řuhu isan tinam, ale o retireti i řuhu isana hařai taunira la sopo jeu na taunim sohena vetasim, ale o sopo sile na masapa isam hasem mata o řomlumiha hinira.

Ha Lo Kilau Na Hařai Malepu

³ O sile na oloolo isana hařai malepu la haratu la hařai malepu varařuhu, harasei mo sopo te tinapua vara la pa lo kilaura.

⁴ Pani vara te hařai malepu te natura teni nona vajiaha mo lo toho, mo řuhu vara enira la vujangi na nora rasu na vavahinau mařa la kilaua sohen hařai atu mo lo tapna kilaura tiroma, matan God mo avulahi hin posposi sei.

† **4:14:** *patu tamlohi rasua:* la posia mo tinapua sohen harihi: patu tamlohi, elda teni bishop. O hite: 5.17, 19

⁵ Haʻrai malepu varaʻuhū mo sohen harihi, mo lo toho hasena, ale enia matea mo tau na ʻromina isan God tarea, ale posina enia mata usiisi mata tuetueni na rani teni na vutepongi,

⁶ pani vara te haʻrai malepu mo lo ʻromʻromia enia hasena, mo lo mauri, pani mo mate moiso.

⁷ O retileu hin la hināu nike isara matan i pa sopo te masapa vara tamlohi la pa pisuhira.

⁸ Pani vara tea mo sopo kilau na tahisana, ale aulu hin haratu, mo sopo kilau la haratu na lolo imana, mo vahaʻri na posposi rasua, posina sei mo sati mo jeu la haratu la sopo rasu God.

⁹ O tau na hija haʻrai matea na pepa sei mo vereā vara sava haʻrai malepu natu, vao kalesia i pa tuenira, hijan haratu purongo mo lahi vahatelete, ale taunina mo jeu mo ngavulu limarave.

¹⁰ Haʻrai atu tamlohi la lo vereā tarea vara enia haʻrai matea mo lo vai na vavahinau ʻuhū, ale vara te natuna, mo kilau mamahunira la mai la tavera, ale tarea mo avulahi vara i lo lavi na vinano la mai na imana, ale posina mo lo sile na oloolo isana tapuhi tinatinapua non God, mo avulahi vara i hoje na palora, ale mo tau na ʻromina vara i vai na vavahinau ʻuhū tari.*

¹¹ O sopo uli na hija haʻrai malepu la sopo vaji-aha matan masalora mata lahi mo jeu na ʻromira vara la usuri Kʻristo, ale la pa rovo hinia matana.

¹² Matana, talai i pa mai isara matan la tope na nora retitauhi isan Kʻristo vara la pa sopo mele

* **5:10:** *Leon Greek mo vereā sohen harihi:* vara mo hoje na palo tamlohi viʻoni. Mo vereā matan tuai la lo tau nora Sabbath na jingoima, ale posposi tataholo enia vara engko teni nom volitusi i pa hoje na palora.

lahi.

¹³ Mo sopo haratu purongo, pani la haʻrai maloko vari purongo, la lo hahau řalihi na jara la vavano na ima tinatinapua matan vara la aleale retireti. Enira la sopo vai na posposi mata maloko vari purongo, la lo sorasora tamlohi, ale la lo tau na ngalsura hin te hinau mo sopo te nora hinau hinia, ale la lo vereea te hinau la sopo tataholo vara la verera.

¹⁴ Ale na lo vereea vara i pa mele řuhu jea vara haʻrai malepu la sopo vajiaha la mele lahi, la mele vasusu moiso, la kilau mamahuni na imara, ale la sopo sile na masapa isan noʻa meresahi teni te masapa vara tea i retireřen hiniřa matara.

¹⁵ Matan hai la vano la posi moiso, la usuri Setan.

¹⁶ Pani vara te haʻrai rasua te haʻrai malepu la lo toho na vaona, i pa lo kilau mamahunira vara la sopo tau na tetehi isana vao kalesia atu, matan vao kalesia la pa lo kilau la haratu la haʻrai malepu varařuhu.

Volin Patu Tamlohi Rasu

¹⁷ Na tavaluna, patu tamlohi rasua la řuhu mata tiroma na vao kalesia, mo tataholo vara ha volira i vaha rua, sohen la haratu la lo voko řilangi na nora retivujavujangi peresi na vujangi.

¹⁸ Matan, Retitapu mo vereea vara, ‘Na rani buluk mo lo savahi na patu wit, ha sopo lasi na jingona vara i sopo eři hani te wit makomo atu’.

Deut 25.4 Ale mo mele vereea vara ‘Mo tataholo vara tamlohi voko i lavi na volina’. *Lk 10.7*

¹⁹ Ale, o sopo tapurongo tiroma isan tea vara mo tuvai na patu tamlohi rasua matea, pani vara tamlohi mo rua teni mo tolu, la levosahia mo

řuhu vara tuvai atu mo tataholo, ale nake o eři tapurongo hinira.

²⁰ Vara te patu tamlohi rasua hatea mo lo usuri na nona hehe, o hapuhia na naho tamlohi rasua tari matan vara enira mo isoiso la pa matahu matana.

²¹ Na nahon God peresi na nahon Křisto Iesu peresi na angelo God mo viřonira, na lo sile na retileu isam vara o taurilati la retileu tari sei na lo vere a isam vara o sopo opoi na tatuara purongo, ale o sopo vai te hinau na posposi tametame!

²² Ale o sopo vilavila vara o tau na limam hin te tamlohi matan vara o tahea vara i vai na vavahinau non Moli, o pa levosahi mamahuni na posina tako, vara i vono engko o pa hase komoho na nona hehe. O lo toho na mauri vokevoke.

²³ Ale o sopo inu na wai purongo, pani o lo inu na waen makomona matan pangem peresi na nom rojoa sei la lo toho isam.

²⁴ Hehe nona tamlohi hai la malue na jara tavera la tiromara na rani mata aria, pani te hehe nona tamlohi tinapua, la pa pala hitahu.

²⁵ Mo sohen haratu isana vavahinau řuhu nona tamlohi, la memera purongo, pani vara la sopo pala tako, pani la pa pala hitahu.

6

Vavahinau Nona Slev

¹ Haratu la rasua, pani la lo slev, mo tataholo vara la sile na oloolo isana nora tamlohi tatavera tarea matan vara tea i sopo eři retisatihi na hijan God teni na vujangi řuhu.

² Vara slev te nora tamlohi tatavera la vorai rasua, la pa sile na oloolo isara, matan enira

la vorai rasua sohera, mo řuhu vara la vai na vavahinau řuhu isara, i jeu na tamlohi tatavera tinapua matan, enira la vorai rasua, ale God mo opoira.

Reti Haluhalu Peresi Na Tavtav Varařuhu

Timothy o vujangi la hinau sei isana tamlohi, o verea řilangi vara la pa oloolo hinira.

³ Vara tea mo lo vujangi te vujangi tinapua, ale mo sopo majinga na reti tataholo non nořa Moli Iesu Křisto, peresi na vujangi sei mo lo usuri na mauri God mo opoia,

⁴ tamlohi sohena, mo mangisi jea, mo sopo levosahi te hinau hatea. Mo opoia hajavua vara i lo sorasora hin te hinau tamlohi la sopo levosahia vara mo varařuhu teni mo vono, ale mo lo retireti na hinau matuvana mata vasi purongo. Posposi atu mo lo vaia mo vai na tamlohi la lo mereimerei, la patumasa, la retireřen, la řomřomi sati hinira,

⁵ ale tarea la vasvas peresi haratu řomira la lejileji, mo sopo te retivarařuhu hinira, ale la řomřomia vara posposi mata mauri rasua mo sile na masapa isara vara la tavgav,

⁶ varařuhu, posposi mata mauri rasua i pa vai na maurim i tavgav, pani isan la haratu purongo sei tarea la sopo řomusuri te hinau tinatinapua,

⁷ matan řa vora lekoleko na varama, ale vara řa mate, řa pa malue lekoleko.

⁸ Pani vara te hařa hanhani teni te nořa ruru, řa pa avulahi matara,

⁹ pani la haratu la opoia vara la tavgav, la pa jovi na hina vaihite, ale masalora mo lihora na hinau rongorongono vono peresi na hinau mata komora

purongo, ale hinau sei mo putehi na tamlohi na komokomo tavera.

¹⁰ Matan, opoia mata mania enia pulo hinau mata hina sasati tari. Matan masalo sohena, mo reve naʻihi na tamlohi hai na malele rasua moiso, ale la hase sarihira hin te rongosati matuvana.

Isoiso Reti Non Paul Isan Timothy

¹¹ Pani isam, tamlohi non God, o rovo hin la hinau sei. O tutungui na malele mata mauri tataholo, o tutungui na posposi atu God mo opoia, rasua, opoia, ʻromperavu peresi na ʻrommalum.

¹² O vai na valum ʻruhu mata rasua, o taurilati mauri tui atu God mo toviho hinia, peresi taviti ʻruhu atu ko vaia na naho tamlohi matuvana.

¹³ Na lo vere na nahon God sei mo lo sile na mauri isana hinau tari la mauri, peresi nahon Kʻristo Iesu sei mo vere na taviti ʻruhu mata reti-varaʻruhu na nahon Pontius Pilate, ale na lo vere a vara

¹⁴ engko o pa taurilati retileu nike, o sopo malue naʻihi hinia i tikeli rani atu Iesu Kʻristo noʻa Moli i mele pala:

¹⁵ na nona rani tataholo,
 enia haratu mo avulahi mo tavera jea,
 ale enia hasena mo aulu na hinau tari,
 enia Supe nona supe,
 enia Moli nona moli.

¹⁶ Enia hasena, mo lo toho jejeu,
 mo lo toho hin memera tavera atu
 tamlohi la sopo eʻi mai mariviti hinia,
 mo sopo lo tea i hitea,
 teni tea i eʻi hitea.
 Isana, ʻra pa sile na oloolo,

ale enia i pa lo tauri na suiha tui tui tarea.
Amen.

Haratu La Tavitav

¹⁷ Isan la haratu la tavitav nake na varama, o vereā isara vara la sopo tau na řomira i sahe aulu teni vara la řomtoho na nora tavitav, matan řa sopo levosahia vara la pa toho i tikeli pangisa. Pani o vereā isara vara la lo řomtoho hin God hasena, matan enia mo lo sile na hināu tari isařa matan vara řa avulahi hinira.

¹⁸ O vereā isara vara la lo vai na hināu la řuhu, o vereā isara vara la tavitav na nora vavahināu řuhu, la pa hansohai, ale na nora řomavulahi la tatamahu vara la asease na nora hināu.

¹⁹ Hin malele sei, la lo takonahi na tavitav tavera matara hasera, sohena pulo řuhu matea matan mauri atu mo lo mai, ale o vereā isara matan vara la eři taurilati mauri atu, enia mauri varařuhu.

Isoiso Reti Non Paul

²⁰ Timothy o matahi la hināu sei God mo lo silea isam moiso. O sopo usuri na sorasora vono teni te řomřomi sei la vereā vara enia ‘hina lelevosahi’

²¹ matan tamlohi hai la lo turu hinia la lo vano malue na malele rasua moiso.

Noku usiusi vara řomřuhu non God i pa toho isamim isoiso.

Tangoa New Testament
The New Testament in the Tangoa Language of
Vanuatu
Le Nouveau Testament dans la langue Tangoa de
Vanuatu

copyright © 2010 Wycliffe Bible Translators, Inc.

Language: Tangoa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 18 Apr 2025 from source files dated 31 Aug 2023

89356e5c-df58-558e-9b27-ae0321adb2df